

劉夢得文集

六

新平州

PDG

劉夢得文集卷第二十八

碑

王氏先廟碑

令狐氏先廟碑

劉君遺愛碑

奚公神道碑

代郡開國公王氏先廟碑

唐制五等有爵服而無山川登于三事得立四廟備物崇祀以交神明敬先報本以輔孝治有國之令典也維長慶三年前相國王公始卜廟于西京崇業里公時鎮劔南東川上章曰臣涯官秩印授品俱第三請如式以奉宗廟制曰可

是歲仲冬申命長男孟堅祔其主于三室明年
公入爲御史大夫復以十一月躬行蒸祭間歲
公出梁州就拜司空禮崇異數廟加祀室大和
二年增新室旣成祔顯考于尊位告饗由禮觀
之者以爲世程第一室曰上儀同幽州別駕府
君諱元政以妣博陵崔氏配第二室曰湖州安
吉縣令贈尚書刑部員外郎府君諱實以妣贈
扶風縣太君馬氏配第三室曰朝散大夫青州
司馬贈戶部侍郎府君諱祚以妣贈武威郡太
夫人賈氏配第四室曰温州刺史贈太尉府君

諱冕以妣贈魯國太夫人博陵崔氏配初周靈
王太子晉遇浮丘公化爲神僊時人號曰王家
其後遂以命氏顯於秦者王翦三世將秦師子
孫分居晉代間東漢有徵君霸霸孫甲亦號徵
君徙居祁縣爲著姓故至于今爲太原人自漢
涉魏益以熾昌凡十葉至後魏度支尚書廣陽
侯罔廣陽有二子神念神感神念南奔梁神感
北仕齊惟儀同府君廣陽侯五代孫也唐興于
太原實從義旗佐成王業故有開府儀同之寵
惟刑部府君以功臣子理二邑不躋貴仕故有

錫羨後大之祥惟戶部府君幼孤以孝聞於鄉
曲未冠以文售於有司由前進士補延州臨安
縣主簿會詔徵賢良策在甲科授瀛州饒陽尉
歲滿遷渭南尉天后在神都東畿羨重遂由渭
南轉河南適逢建萬象神宮旬內吏分董其役
因上書切諫繇是名益聞開元初以大理司直
馳輶車聯讞大獄聞禹朔漢所至浹平早以藥
棘傷生晚成劇恙樂就夷曠故不至大官惟太
尉府君生於治平時以文學自奮年十有五貴
然從秋賦明年春外名于司徒又一年玄宗御

層樓發德音懸文詞政術科以置髦士府君策
最高授太常寺太祝未幾復以能通道德南華
沖虛三真經進蓋屋尉天寶中歷左拾遺左補
闕禮部司駕二外郎屬幽陵亂華遣兵南服因
佐閩粵改檢校比部郎中行軍司馬時中原甫
寧江南爲吉地二千石多用名德乃以府君牧
溫州朝廷虛公卿以俟高第及聞永嘉人輟春
罷社搢紳閒以不淑相弔焉雖位負于道而邁
德垂短後之人得以續承丕揚之其儲休啓祐
有自玄爾生三子皆聰明絕人長曰沼以神童

仕至檢校禮部郎中次曰潔以竒文仕至國子
司業今代郡公實季子也早在文仕籍射策連
中咸世其家貞元中德宗聞其名自藍田尉召
入禁中視草厥後三典書命再參內廷憲宗器
之付以國柄翊贊有道雖冊免常居大僚今年
自梁州請覲上思用舊臣爲羽儀遂領太常其
公府如故以一心事六君顯官重務靡不揚歷
且夫起諸生至三公而心愈卑道益廣出授黃
鉞以臨諸侯入服華章以謁家廟追崇極大位
血食備多室享全榮而奉昭薦嗚呼公侯之孝

歟宜書廟器以視喬公之三鼎其詞曰

闕宇神庭邃清而嚴上公之儀四室耿耿犧以
潔牲粢以大糝交神尚敬合魄尚氣子姪宗工
駿奔奉事副笄侈袂儼恪居次孝孫兢兢執爵
而外以裸以擣以伏以興水陸具來羶薌畢登
列于園方其器增增乃禘乃嘗敬而追遠二昭
二穆孝以尊本瞻瞻几幄躡躡堂閭禮成起慕
涕落玄衮濡露踐霜誰無永懷不如達者哀與
榮偕逢時奮庸誰不得位不如仁人以道爲貴
惟公之達兮名以顯親惟公之仁兮德以澡身

六朝之清臣一代之全人宜其世家翼翼振振
罔不肅祗于廟之門

彭陽侯令狐氏先廟碑

今上元年七月十三日汴州刺史宣武軍節度
副大使知節度事汴宋亳等州觀察處置使銀
青光祿大夫檢校禮部尚書兼御史大夫上柱
國彭陽縣開國伯令狐公西嚮拜章上言守臣
楚蒙被恩澤列爲元侯得立家廟以奉常祀制
書下其奏于有司於是善相考祥得地於京師
通濟里居無何新廟成公以守藩故申命季弟

監察御史定卜牲練日越八月丁亥祔饗三室
埴墉以尚幽設幄以迎精禮無尤違神用寧謐
第一室曰秦州上邽縣尉諱潛以妣太原王氏
配第二室綿州昌明縣令贈吏部尚書諱崇亮
以妣贈太原郡夫人河東柳氏配第三室太原
府功曹參軍贈太子太保諱承簡以妣贈魏國
太夫人富春孫氏配明年十月公由浚郊以介
圭入覲真拜戶部尚書進爵爲侯旣辭戎旗得
以列侯謁三廟是歲南至上不視朝又得以展
時祭先期致齋栗然以勸旣齋盡志歆然永思

奉其百順陳以具物始躋而虔恭終獻而沈瀾
既卒事顧麗牲之石宜有刊紀乃俾家老授其
謀于所知古令狐晉邑也晉大夫魏顥以輔氏
之功始封焉其易名曰文國語所謂令狐文子
是已其先文王之昭畢公高之裔畢萬爲晉卿
始封于魏自萬至顥蓋四世其後三十七世藍
田侯蚪仕拓跋魏爲燉煌郡太守子孫因家遂
占數爲郡人藍田之孫熙在隋爲納言惟上邽
府君納言之玄孫道克肖而位不至惟尚書府
君西州之右族光未耀而德已基惟太保府君

志爲君子儒以明經居上第調補陽安縣主簿
歷正平尉汾州司法參軍陝州大都督府兵曹
終于太原府首掾始以顯經進旣仕旁通百家
愛穀梁子清而婉左丘明國語辯而工司馬遷
史記文而不華咸手筆朱墨究其微旨愷悌以
肥家信誼以急人德充齒耄獨享天爵故休祐
集于身一作支後徽章流乎佳城凡以子貴承澤降
命書告第者始贈尚書祠部郎中再贈禮部尚
書三加右僕射四爲今稱先夫人亦四徙封密
印纍纍邦族聳慕生三子皆才彭陽公爲嗣次

子從端實肅給今爲檢校膳部郎中參河東軍
事季子前所謂監察御史今主柱下方書溫敏
而有文綽綽然真令兄弟唯彭陽以詞筆取科
名累參侍從由博士主尚書牋奏典內外書命
遂登樞衡言文章者以爲冠擁節總戎率身和
衆留惠于盟津變風于浚都言方略者以爲能
夫浚師嘆喑難治乘豐竊發寢成習俗莅止五
載飲和革心束馬來朝熊羆隕涕問公還期觴
必祝之留爲常泊旋命居守汴人聞公之東近
而愈懷翹翹瞿瞿盡西其首言遺愛者可紀焉

貴而率禮老而能慕怵惕乎霜露齊莊乎廟桃
睦其仲季施及鄉黨言孝悌者歸厚焉勒銘于
碑以代彝鼎文曰

已孤之孝莫如備物顯顯新廟四阿三室時惟
仲月卜用柔日醴醎苾芬牲牲博膾邊鯁在堂
簫管在庭孝孫蒸蒸躬若奉盈低簪委紳薦俎
登鉶盥饜交感涕流緣纓禮以備儀誠以致美
祖考來格錫之丕祉工祝告訖退循軒祀乃授
風人作詩以紀猗歟彭陽之寵光佐憲皇穆皇
西省東臺迭爲侍郎國之大政咨爾平章勅宗

凝旒俾鎮雍丘入爲地官令守東周彭陽之忠
厚宜介福以壽東郊旣釐可復朝右綿綿其胄
系于周舊由我顯起必昌其後大和紀元作廟
之首刻碑廟門龍集巳酉

高陵令劉君遺愛碑

縣內之大夫鮮有遺愛在其去者蓋邑居多豪
政出權道非有卓然異績結于人心浹于骨髓
安能久而愈思大和四年高陵人李仕清等六
十三人具前令劉君之德詣縣請金石刻縣令
以狀申府府以狀考于明法吏吏上言謹按寶應

詔書凡以績將立碑者其具所紀之文上尚書
考功有司考其詞宜有紀者乃奏明年八月庚
午詔曰可今書其章明有以結人心者揭于道
周去涇水東行注白渠醞而爲三以沃關中故
秦人常得善歲按水部式決洩有時畎澮有度
居上游者不得擁泉而顓其腴每歲少尹一人
行視之以誅不式兵興已還寢失根本涇陽人
果擁而顓之公取全流浸原爲畦私開四竇澤
不及下涇田獨肥他邑爲枯地力旣移地征如
初人或赴訐泣迎尹馬而占涇之腴皆權倖家

榮勢足以破理許者覆得罪繇是咋舌不敢言
吞冤銜忍家視孫子長慶三年高陵令劉君勵
精吏治視人之瘼如燹疽在身不忘波去乃循
故事考式文暨前後詔條又以新意請更水道
入于我里請杜私竇使無弃流請遵田令使無
越制別白纖悉列上便宜椽吏依違不決居二
歲距寶曆元年端士鄭覃為京兆秋九月始具
以聞事下丞相御史御史屬元谷實司察視持
詔書詣渠上盡得利病還奏青規中上以谷奉
使有狀乃俾太常撰日京兆下其符司錄姚康